

**UCAPAN PERASMIAN  
YANG BERUSAHA EN AMIRUL BIN ARIPIN  
PEMANGKU PENGARAH  
JABATAN ALAM SEKITAR NEGERI SARAWAK**

**MAJLIS MENANDATANGANI MEMORANDUM PERSEFAHAMAN  
(MoU) BAGI KERJASAMA DALAM PELAKSANAAN PROGRAM  
KESEDARAN ALAM SEKITAR**

**ANTARA**

**JABATAN ALAM SEKITAR (JAS) DENGAN BINTULU PORT  
HOLDINGS BERHAD**

**7 MEI 2019  
HILTON HOTEL,  
KUCHING, SARAWAK**

- 1. Yang Berbahagia Dato Mohammad Medan Abdullah  
Ketua Pegawai Eksekutif Kumpulan Bintulu Port Holdings  
Berhad**
- 2. Ketua-Ketua dan wakil-wakil Ketua Jabatan**
- 3. Ketua-Ketua Pegawai Operasi Biport Bulkera Sdn. Bhd. dan  
Samalaju Industrial Port Sdn. Bhd.**
- 4. Pegawai-pegawai daripada Bintulu Port Holdings Berhad dan  
Jabatan Alam Sekitar negeri Sarawak**
- 5. Para Media**
- 6. Tuan-Tuan dan Puan-Puan yang dihormati sekalian**

## **Assalamualaikum dan Salam Sejahtera,**

1. Terlebih dahulu marilah kita memanjatkan setinggi-tinggi kesyukuran ke hadrat Allah S.W.T kerana dengan rahmat dan izinNya kita dapat bersama-sama di Majlis Menandatangani Memorandum Persefahaman (MOU) Mengenai Kerjasama Dalam Pelaksanaan Program Kesedaran Alam Sekitar antara Jabatan Alam Sekitar dengan Bintulu Port Holdings Berhad.
2. Saya ingin merakamkan ucapan terima kasih dan penghargaan kepada pihak Bintulu Port Holdings Berhad di atas kesudian dan kerjasama di dalam penganjuran Majlis ini. “Selamat Datang” dan “Selamat Menyambut Ramadhan Al-Mubarak” kepada Dato, tuan-tuan dan puan-puan yang saya hormati sekalian.
3. Terima kasih kepada semua yang sudi melapangkan masa untuk hadir ke majlis pada petang ini.
4. Saya berasa sangat bertuah kerana pada hari ini, JAS sekali lagi secara rasminya akan melebarkan lagi jaringan kerjasama dalam melaksanakan aktiviti – aktiviti kesedaran alam sekitar.
5. Untuk makluman hadirin sekalian, JAS Negeri Sarawak telah menjalin hubungan kerjasama pintar (*smart and strategic partnership*) menerusi MOU dalam pelaksanaan program kesedaran alam sekitar dan Program Rakan Alam Sekitar sebagai salah satu langkah proaktif bagi menangani isu-isu alam sekitar di Negeri Sarawak.

6. Tahniah dan syabas kepada Bintulu Port Holdings Berhad di atas kesudian menjalin hubungan kerjasama pintar ini. Dengan termeterainya perjanjian MoU antara JAS Sarawak dengan Bintulu Port Holdings Berhad pada hari ini, menjadikan jumlah keseluruhan 11 organisasi di Negeri Sarawak menandatangani MOU dengan JAS Negeri Sarawak. JAS juga berbesar hati sekiranya ada pihak-pihak lain yang berminat untuk menjalinkan hubungan kerjasama strategik seperti ini.

**Hadirin sekalian,**

6. Pemuliharaan alam sekitar merupakan tanggungjawab kita semua. JAS mempunyai wawasan bahawa masyarakat Malaysia sensitif terhadap pemuliharaan alam sekitar dan sanggup memikul tanggungjawab untuk memastikannya terus dipelihara bukan sahaja untuk generasi kita tetapi juga bagi generasi akan datang. Ini menjadi harapan dan hasrat Jabatan supaya setiap warganegara Malaysia menanamkan sikap cintakan alam sekitar serta membudayakannya dalam kehidupan seharian.

7. Dalam hubungan ini, dan selaras dengan inisiatif Jabatan iaitu *Engaging The Industry Program - Environmental Sustainability Manager*, JAS telah mengambil pendekatan dengan menjalinkan kerjasama pintar (*smart and strategic partnership*) dengan pihak industri, Institut Pengajian Tinggi, Institut Pendidikan/ Latihan, pertubuhan bukan kerajaan (NGO) dan pertubuhan-pertubuhan lain dalam menjalankan aktiviti kesedaran alam sekitar.

8. Program Sambutan Utama Jabatan Alam Sekitar ialah Sambutan Hari Bumi yang diraikan pada 22 April setiap tahun, Hari Alam Sekitar Sedunia pada 5 Jun, Hari Ozon Sedunia pada 16 September dan Hari Alam Sekitar Negara pada 21 Oktober setiap tahun.

9. Di peringkat Negeri Sarawak, sesi *engagement* dan *consultation* telah dilaksanakan dengan semua pihak berkepentingan dan antara aktiviti yang telah dilaksanakan ialah Program Enviro Run dan Aerobathon, Program Kesedaran Alam Sekitar Bersama Murid-Murid Tabika, Program Pengumpulan Sisa Elektrik Dan Elektronik Isi Rumah, Kem Kesedaran Alam Sekitar, Enviro Ride, Ceramah, Kuiz Alam Sekitar, penanaman pokok, pameran, aktiviti hands-on, permainan, kempen hindari plastik sekali guna, gotong-royong pembersihan pantai dan program-program alam sekitar yang lain. Insya Allah lebih banyak lagi program - program sedemikian akan dapat dijalankan dengan kerjasama semua pihak dengan pendekatan *smart and strategic partnership* ini.

10. Jabatan ini juga ingin mengambil kesempatan ini untuk merakamkan setinggi-tinggi penghargaan kepada pihak BPHB di atas kerjasama dalam penganjuran Program Sambutan Hari Alam Sekitar Peringkat Kebangsaan di Negeri Sarawak pada tahun 2016. Diharap kerjasama ini dapat diteruskan untuk program-program kesedaran alam sekitar yang akan datang.

**Para Hadirin sekalian,**

11. Di sini juga, saya juga ingin memaklumkan bahawa Sambutan Hari Alam Sekitar Negara (HASN) akan disambut pada 21 Oktober setiap tahun. Sambutan ini akan diadakan secara serentak di seluruh Negara dan setiap JAS Negeri akan merancang program / aktiviti yang akan dilaksanakan.

12. Saya berbesar hati menjemput pihak BPHB untuk menyertai dan bekerjasama dalam penganjuran program-program yang dirancang oleh JAS. Sekiranya pihak BPHB mempunyai perancangan aktiviti berkaitan kesedaran alam sekitar boleh diraikan bersempena Hari Alam Sekitar Negara di Bintulu dan JAS Sarawak bersedia membantu dan turut serta menjayakan program tuan- puan.

11. Alhamdulillah sebentar lagi akan berlangsungnya sesi menandatangani MOU antara JAS dengan Bintulu Port Holdings Berhad bagi menjalankan program-program kesedaran pada masa hadapan. Untuk makluman, MOU ini menfokuskan kepada dua intipati utama iaitu:

- a. Melaksanakan dan mempromosikan aktiviti / program kesedaran alam sekitar; dan
- b. Melaksanakan, menggalakkan dan meningkatkan penyertaan keahlian dalam program Rakan Alam Sekitar

12. Ia berfungsi sebagai suatu pernyataan persefahaman dan hasrat untuk bekerjasama antara satu sama lain di mana pihak-pihak yang menandatangani MOU ini tidak terikat kepada apa-apa tanggungan

atau liabiliti secara perundangan.

13. Adalah menjadi harapan saya agar pelaksanaan pendekatan baharu seperti ini dapat menambah kesedaran masyarakat terhadap alam sekitar dan meningkatkan keberkesanan sistem penyampaian perkhidmatan kerajaan dan mencapai situasi menang-menang (*win-win situation*) kepada semua pihak.

**Hadirin sekalian,**

14. Saya mengambil kesempatan di sini untuk mengucapkan ribuan terima kasih kepada semua pihak yang terlibat dalam menjayakan majlis ini terutamanya kepada Bintulu Port Holdings Berhad di atas kesudian untuk menjalankan kerjasama korporat bersama JAS. Tahniah dan syabas di atas usaha dan komitmen yang telah ditunjukkan. Saya berharap kita semua akan terus memperjuangkan usaha-usaha pemuliharaan alam sekitar di Malaysia dan kerjasama strategik seperti ini akan menjadi medan utama dalam memberikan manfaat kepada semua pihak khususnya di Negeri Sarawak.

15. Sekali lagi saya mengucapkan terima kasih di atas kesudian Tuan-Tuan dan Puan-Puan, termasuk ketua dan wakil – wakil agensi kerajaan yang hadir ke majlis ini. Kehadiran Tuan-Tuan dan Puan-Puan ke Majlis ini membuktikan sokongan padu pelbagai pihak terhadap usaha-usaha pemeliharaan alam sekitar. Marilah kita bersama-sama menjadikan kelestarian alam sekitar dan pembangunan lestari tanggungjawab kita bersama.

Dengan itu, saya sudahi dengan sekian, terima kasih.